

Home > THIBAUT DE CHAMPAGNE > EDIZIONE > Je n'os chanter (n'ai chante) trop tart ne trop souvent
> Edizioni > Wallensköld

Wallensköld

I.

Je n'os chanter trop tart ne trop souvent,
ne si n'ai gré de chanter ne de taire;
ainz ai servi en pardon longuement,
que je cuidai adès tant dire et faire
que je peüsse a cele meilleur plere
qui m'ocirra, se Amors li consent,
tout a loisir por plus fere torment.

II.

Tuit mi maltret fussent a mon talent,
se ja nul jor en cuidasse a chief traire,
mès je voi bien que ne m'i vaut noient,
qu'amors m'ont si atorné mon afere
qu'amer ne l'os ne ne m'en puis retrere.
Ensi me tient Amors, ne sai comment,
c'un poi la hé tres amoreusement.

III.

Ensi m'estuet et haïr et amer
celi a qui ne chaut de mon martire.
S'ele m'ocit, de poi se puet vanter,
q'il n'i couvient pas trop grant maiestire
de son ami engingnier et ocirre.
Nus ne se doit vers s'amie garder,
s'il ne la veut du tout lessier ester.

IV.

Mult me sout bien esprendre et alumer
au biau parler et au simplement rire.
Nus ne l'orroit si doucement parler
qui ne cuidast de s'amor estre sire.
Par Dieu, Amors! Ce vos puis je bien dire
qu'on vous doit bien servir et honorer,
mès d'un petit s'i puet on trop fier.

V.

Tant me fera et languir et douloir
com li plera, q'ele en a bien poissance,
puis que merciz ne me puet riens valoir
fors biaux parlers et servise et sousfrance,

et avec ce i recouvient cheance.
Tant i couvient, qui joie en veut avoir,
par un petit que ne m'en desespoir.

VI.

Amors me tient, qui ne me let mouvoir,
ainz me detient autresi par senblance
conme celui qui a presté avoir
a mal detor sanz plege et sanz fiance,
que ne li ose escondire creance.
Ensi me tient Amors en son pouoir
q'il me couvient ce qu'ele veut vouloir.

- letto 435 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/wallensk%C3%B6ld-39>